



JUDICIAL SYSTEM MONITORING PROGRAMME

PROGRAMA MONITORIZASAUN BA SISTEMA JUDISIÁRIU

Komunikadu Imprensa
Distritu Ermera
Agostu 2014

JSMP organiza treinamentu kona-ba justisa ba ema hotu iha Suku Mau-Ubo, Hatolia-Ermera

Iha 6 Agostu 2014, Judicial System Monitoring Programme (JSMP), liuhusi unidade LRU fasilita treinamentu ba lider komunitária sira iha Suku Mau Ubo, Sub-distritu Hatolia, Ermera.

Partisipante ba treinamentu ne'e hamutuk ema nain 30 ne'ebé kompostu husi mane ema na'in 8 no feto hamutuk ema na'in 22.

Materia treinamentu ne'ebé apresenta no diskuti durante sesaun treinamentu ne'e inklui konseitu baziku kona-ba direktus umanus, lei formal ne'ebé vigor iha Timor Leste, provizaun relevantes sira iha kodigu penal no tipu kazu krime sira ne'ebé maioria akontese iha sosiedade. Aleinde ne'e diskuti mós kna'ar no responsabilidade institucional hosi kada autór judisiáriu hanesan juis, ministériu públiku no ajente prosesual sira hanesan defensor públiku, advogadu privadu no oinsa atu asesu ba justisa formal wainhira sai nu'udar akuzadu ka sai hanesan vítima husi krime ruma.

Treinamentu ne'e ho objetivu atu hasa'e kuiñesimentu autóridade komunitáriu no comunidade sira ne'ebé hela dok husi tribunál. Dalabarak kazu violénsia domestika no violénsia seksuál, ka violénsia bazeia ba jéneru akontese iha comunidade sira iha área rural maibe sira la hatene oinsa atu lori prosesu ne'e tuir sistema justisa formal.

“Papel autoridade komunitáriu ho nia estrutura tomak ne'e importante no estratejiku teb-tebes iha comunidade iha kontestu promove esforsu kolektivu atu hametin sistema justisa formal no prevensaun jerál iha comunidade, tanba autóridade komunitáriu sira mak nu'udar rekursu no fontes primariu iha comunidade nia laran”, dehan Diretór ezekutivu JSMP, Luis de Oliveira Sampaio.

Xefe Suku Sr. Domingos Noronha iha sesaun abertura no enseramentu hato'o nia apresiasaun no agrasimentu ho atividade treinamentu ne'e no husu comunidade sira atu akompañia didiak programa ne'e hodi bele kumprinde oinsa sistema justisa formal nia funksionamentu. Tanba informasaun sira ne'e bele sai hanesan mata-dalan ba comunidade wainhira hasoru problema ruma iha suku laran no bele aplika ba sira nia moris loron-loron nu'udar sidadaun ne'ebé diak.

JSMP observa katak partisipante sira hatudu sira nia interese hodi participa ativu tebes atraves husi husu perguntas no apresenta sira nia esperensia rasik. Partisipante sira haktuir katak

treinamentu kona-ba justisa formal ne'e foin permeira ves sira simu. Tanba ne'e, sira manifesta sira nia laran kontente no apresiasaun ba JSMP atraves husi treinamentu no divulgasaun informasaun legal importante hirak ne'e.

Konsidera importansia hosi atividade ne'e, partisipantes sira rekameda ba JSMP katak, wainhira iha atividade hanesan iha futuru sira rekomenda atu númeru partisipantes la bele limita ba ema nain 30 deit. Maibe bele involve too ema nain 60 ka 70, nune'e komidade barak mak kumpriende kona-ba lalaok justisa formal no hatene sira nia direitu no dever nu'udar sidadaun tuir lei aplikavel.

Atividade treinamentu ne'e realize tanba hetan suporta orsamentu husi UNDEF.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

telefone: 3323883/77295795